

Piffissami 13. november 2021-miit 27. november 2021-p tungaanut Nuummi killilersuinerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi §§ 6, 6 a, 12 a, 12 b, 12 c, aamma 21 b aamma § 29 imm. 2 aamma 3 malillugit aalajangersarneqarput:

Atuuffia

§ 1. Nalunaarut manna atuuppoq:

1) Kommuneqarfik Sermersuumi Nuummi

Imm. 2. Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

Imm. 4. Nalunaarut eqqartuussivinnut atuutinngilaq.

Imm. 5. Nalunaarut namminersortunut pisortaniillu ulluunerani neqeroorutitut, atuarfinnut, ilinniarfeqarfinnut il.il. nappaatit tunillaassortut akiorniarlugit iliuitsit pillugit Inatsisartut peqqussutaanni § 22 naapertorlugu atuutsinngilaq.

Imm. 6. Nalunaarut angerlarsimaffinni aaqqissuussanut il.il. atuutinngilaq.

Imm. 7. Nunatsinni Nakorsaaneqarfik nalunaarummit immikkut akuersissuteqarsinnaavoq.

Illup iluani aaqqissuussinerni il.il. peqataasinnaasunut killilersuineq

§ 2. Illup iluani aaqqissuussinerni, nalliuttorsiornerit, sammisaqartitsinerit assigisaalluunniit amerlanerpaamik inunnik 20-nik peqataasoqaqusaapput, § 4-mullu naapertuutissallutik.

Silami aaqqissuussinerni il.il. peqataasinnaasunut killilersuineq

§ 3. Aaqqissuussat, nalliuttorsiornerit, sammisaqartitsinerit assigisaalluunniit silami ingerlanneqartussat amerlanerpaamik 20-nik peqataasoqaqusaapput.

Ininut kikkunnilluunniit iserfigineqarsinnaasunut piumasaqaatit

§ 4. Inuit aamma inatsisit naapertorlugit ingerlatsiviusut, tassunga ilanngullugu pisortat oqartussaaffii aamma suliffeqarfii, ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inuit inini isersinnaatitaasut amerlanerpaamik 20-iusinnaapput, piumasaqaammi timmisartoqarfiit aamma init pisiniarfusut ilaatinneqanngillat. Inini sulisut inunnut 20-inut ilanngullugit naatsorsoneqanngillat.
- 2) Ajornanngippat init imatut pequsersorsimassapput suliffeqarfiillu imatut ingerlanneqassallutik tuniluunnissaq minnerpaaffianiitineqassalluni, tassunga ilanngullugu pisisartut pulaartullu imminnut qanillinnginnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 5) Pisisartunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aaqqateqassapput.

§ 5. Inuussutissarsiummik ingerlatalik politiit naliliinerat malillugu § 4-mik unioqutitsisimappat, inuussutissarsiummillu ingerlatalik § 4-mik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatitsinissaanik politiinit peqquneqarsinnaavoq.

Nuumminngaanniit angalanermi piumasaqaatit

§ 6. Inuit Nuummiit nunatta sinneranut angalaniarlutik aallartussat Covid-19-imut naammassillugu akiuussuserneqarsimassapput PCR-imillu misissortinnermi tunillatsissimannginnermik imaluunniit Covid-19-imik tunillatsissimannginnermik uppersaarnissamik angallassisussamut takutitsissallutik.

Imm. 2. Inuit tullinguuttut makku imm. 1-imi piumasaqaatinut ilaatinneqanngillat:

- 1) Inuit angerlarsimaffiminnukarlutik angalasut.
- 2) Inuit ilinniartiartorlutik assigisaanilluunniit angalasut.
- 3) Inuit inuiaqatigiinni suliaqartitaallutik angalasariaqalersut.
- 4) Inuit Covid-19-imut akiuussutissamik kapitinnissamut Nunatta Nakorsaaneqarfianit nalinginnaasumik innersuunneqanngitsut.
- 5) Inuit 11-nik ukiullit ukiukinnerusulluunniit.
- 6) Sulisut tamanut angallassisummi pineqartumi aallartussanik atorineqartussanik sulisut.
- 7) Inuit Nuummiit nunatta avataanut angalasussat nunatta iluani pisariaqanngitsumik uninngaffiunngitsumik aallartussat.

Imm. 3. Inuit imm. 2-mi ilaatinneqartut Covid-19-imut PCR-imik misissortinnermi tunillatsissimannginnermik angallassisussamut takutitsissapput Nuummiit aallannginnerminni.

Imm. 4. Imm. 1-ip maleruarneqarnissaata qulakkeernissaa angallassisummi piginnittup akisussaaffigaa.

Imm. 5. PCR-imik misissortinneq aallanermiit annerpaamik 48 tiiminik pisoqaanerussanngilaq.

§ 7. Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup ingerlarngata naammassisimanagera uppersarsinnaappagu.

Imm. 2. Nunatta Nakorsaaneqarfiata akiuussuserneqarsimanerup uppersarsaatit sorliit akuerisaanersut aalajangissavai.

§ 8. Inuit siusinnerusukkut Covid-19-imik tunillatsinnikuusimasut PCR-ilu atorlugu misissortereernerimik Covid-19-imik tunillatsissimanerminnullu minnerpaamik ulluni 14-ini annerpaamik sapaatit akunnerini 12-inik pisoqaassusilinnik uppersarsaasinnaasut, inatsisitigut tamakkiisumik akiuussuserneqarsimasutut isigineqassapput.

Imm. 2. Uppersarsaat suna uppersarsaatitut akuerisatut atorineqassanersoq Nunatta Nakorsaaneqarfiata aalajangersinnaavaa.

Qanermut imaluunniit kiinnamut assiaquteqarnissamut piumasaqaat

§ 9. Inuit aqqaneq-marlunnik sinnerlugillu ukiullit qanermut imaluunniit kiinnamut assiaquteqassapput:

- 1) inini kikkunnit tamanit iserfigineqarsinnaasuni isersimagunik.
- 2) pisiniarfinni kiffartuussinermillu ingerlatsivinni sulisut pisisartunik attaveqarnerminni.
- 3) assartuutini kikkunnit tamanit ilaaffigineqarsinnaasuni, tassunga ilanngullugit bussini taxanilu ilaagunik.

Imm. 2. Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

Imm. 3. Pisiniarfinni kiffartuussivinnilu sulisut qanermut kiinnamulluunniit assiaqutit atunngikkaluarlugit pisiniat sulisullu akornanni plastikimik assiaqutit atorsinnaavaat.

Imm. 4. Qanorluunniit immikkoortumi 1-imi allaqqasoqarluarpat, peqqutissaqarluarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, pisuni imaattuni:

- 1) Nerinermi imaluunniit imernerminni.
- 2) Nakorsaatitornermi.
- 3) Qarngit aalaneratigut atuasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaagunik ipianngulersitsippataluunniit.
- 5) Politiit kinaassutsimik uppersarsaaneranni.

§ 10. Qanermut assiaqutitut taaneqartut tassaapput qanermut qinngamullu assiaqutit ataasiartakkat imaluunniit annoraaminermi sanaat allunaasamillu tasisartumilluunniit siutitut ikkuttartut imaluunniit niaqqup tunuatungaani qilertartoq kiinnamullu attuumasoq.

Imm. 2. Kiinnamut assiaqutitut tassaapput isinut, qanermut qinngamullu assiaqutit plastikimik sanaat kiinnamut attuumanngitsut.

Inuit pillugit paasissutissanik suliarinninnerit

§ 11. Nalunaarut una naapertorlugu inuup akiuussuserneqarsimaneranut inissisimaffia uppersarniarlugu inuit pillugit paasissutissanik suliarinnittoqarsinnaavoq.

Pineqaatissiissutit

§ 12. §§ 2, 6 aamma 9-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttuleringeq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq aamma atuunneranut piffissaliussaq

§ 13. Nalunaarut ulloq 13. november 2021 nal. 8:00 atuutilissaaq, taamaattoorli takuuk imm. 2.

Imm. 2. § 6 træder 15. november 2021 atuutilissaaq.

Imm. 3. Nalunaarut malillugu killilersuinerit, inerteqquteqarnerit, peqqusinerit il.il. 27. november 2021 ilanngullugu atuutissapput.

Namminersorlutik Oqartussat, ulloq 12. november 2021

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut